

Galdu ezineko hitzordua Euskal Herriko bazter guztietatik etorritakoentzat

Adin guztietako jendea bildu zen atzo Bilbora zazpi herrialdeetatik etorria

Gorane Agirre / Bilbo

Armando Fuente •

Donostia

«Barrionuevo eta Verarena jasanezina izan da»

► Jose Barrionuevo eta Rafael Vera aske utzi izana «jasanezina» iruditzen zaio Donostiako mediku dentista honi, eta horrek bultzatuta hurbildu zen atzo Bilbora bere emaztearekin batera. Bizkaiko hiriburura goizean goizetik bertaratu zen, hainbat arrazoik bultzatuta: «Gauza askok ekarri naute hona. Baina Barrionuevo eta Veraren auziak Justizia guztientzat berdina ez dela erakutsi didanez, nire haserre hori agertzera etorri naiz. Argi geratu da Justizia ezberdina dela, nongoa zaren».

Dolores eta Fermin •

Getaria

«Gure presoengatik gaude hemen»

► Dolores eta Fermin, hurrenez hurren 70 eta 81 urte eta atxake bat edo beste badute ere, argi zeukaten atzo arratsaldean Bilbon izan behar zutela, ezin zutela hutsik egin. Hala, manifestaziora joateko Getarian antolatutako autobus batean etorri ziren. Bilbora zerk ekarri zituen galdetuta, ia aho batez erantzun zuten: «Gure presoengatik, gurengatik, gaude hemen. Presoen eskubideak betetzea eskatu behar dugu. Guk ez



MARISOL RAMIREZ

Aurpegi ezagunak bai, baina batez ere herritarrek, aurpegi ezezagunak, izan ziren atzo protagonista.

badugu egiten, zeinek egingo du ba...». Era berean, gogor salatu zuten euskal presoen senideek jasaten duten egoera. «Horrela tratatzeko inolako eskubiderik ez dago».

Mari Larrinaga • Zornotza

«Presoek hemen egoteko eskubidea dute eta ez pribilejioa»

► Euskal presoen Euskal Herriratzeara eskatzeko manifestazioak ez ditu berriak Zornotzako adineko emakume honek. Hala ere, oraingo ho-

netan aldarrikapen hori sekula baino ozenago oihukatu behar dela dio. Izan ere, bere ustez, «hemen egotea beren eskubidea da eta ez pribilejio bat». «Eurek egin duten legea bete dezatela; ez dugu pribilejiorik eskatzen, beraien legea betetzea baino».

Batite Oiarzabal • Baiona

«Presoak lehenbailehen hurbildu behar dituzte»

► Batite Oiarzabal autoan etorri zen Baionatik Bilbora, beste bi emakume lagune-

kin batera. Hirukote honek ohikoak ditu presoak Euskal Herriratzeara aldarrikatzeko manifestazioak. Oiarzabalek bi hitzetan azaldu zuen atzo Bilbora joateko arrazoiak: «Euskal presoak lehenbailehen hurbildu behar dituzte, gero bakea egin, eta azkenik, denak etxera».

Karmen • Iruñea

«Ea bakea lortzen dugun behingoz»

► Senarrarekin eta seme-alabekin batera joan zen Bilbo-

ra durangar hau. Berak ere ohikoak ditu euskal presoak Euskal Herriratzeara eskatzeko manifestazioak. Bere iritziz, «aldarrikapen hori beti zilegizkoa izan bada, orain are ozenago entzunarazi behar da, guztiok amesten dugun bakea gero eta hurbilago baitago, eta ia behingoz lortzen dugun».

Iñigo Olaizola • Azpeitia

«PPri presoak Euskal Herrian egon behar dutela esatera gatoz»

► Iñigo Olaizola gaztea Azpeititik presoen aldeko Bilboko manifestaziora etorri ziren bederatzi autobusetako batean etorri zen, beste lau lagunekin batera. «PPri euskal presoek Euskal Herrian egon behar dutela esatera gatoz, pixka bat presio soziala egitera. Presoen esku-bidea da jaioterritik hurbil egotea, eta hori bete dezatela eskatu behar diogu PPri», azaldu zuen inolako zalan-tzarik gabe gazte gipuzkoar honek.

Jon Arrieta • Gasteiz

«Presoekin egiten ari diren bidegabekeria salatzeke etorri gara Bilbora»

► Adineko gasteiztar honentzat atzokoa euskal presoak Euskal Herriratzeara eskatzeko parte hartzen zuen lehenengo manifestazioa zen, eta erabat hunkitua zegen. «Bazen garaia Euskal Herriko abertzale guztiak batzeko; berandu bada ere, gaur denak bildu gara alderdi espainolak euskal presoekin eta beren senideekin egiten ari diren bidegabekeria salatzeke eta lehenbailehen konpon dezatela exijitzeko».

Jose Julian Bakedano •



Bilboko Arte Ederretako Museoko zuzendariordea.

«Elkartasunagatik nago hemen»

► «Lagunei zor diedan elkartasunagatik nago hemen. Ez dut lagunik kartzelan, baina presoen senide batzuk lagunak ditut. Madrilek entzun egingo du, beste gauza bat da aditzea. Ni itxaropentsu naiz, baina errealista ere bai. Konfiantza dut arazo hau konpontzeko borondate ona izango dela. Nire iritziz, positiboa da alderdi abertzale guztiek bat egitea presoen eskubideen alde.

Edu Barinaga • Baleuko



ekoiztetxeko zuzendaria

«Gobernuak hemen bildutako jendearen hitza entzun behar du»

► «Hemen bildu den jendea ikusita, oso pozik nago. Oso garrantzitsua da alderdi abertzale guztiek bat egitea horrelako aldarrikapen batekin. Bada ordua abertzale guztiak batu eta gure eskaerak egiteko kalera irteteko. Gobernuak gor egon behar du hemen bildutakoen eskaera ez entzuteko. Hala ere, ez dut uste ezer egingo duenik. Nik, behintzat, ez dut itxaropen handirik».

Karmelo Ariznabarreta •



Pilotaria

«Gaurko hau lehenengo urratsa da»

► «Nire ustez gaurko manifestazio hau lehenengo urratsa da, baina gehiago egin beharko dira. Euskal presoak Euskal Herrira etortzea garrantzitsua da, baina ez dut uste hogei urtetan gertatu den guztia eta gero gauza hemen geldituko denik. Espainiako Gobernuak bere borondateagatik ez du ezer egingo, eta guk, herri bezala indar bat egin behar dugu haien kontra, iritzia alda dezaten».

J.A. Gisasola 'Zelai' •



Harrijasotzailea

«Madrileko gobernua itsua ez bada, zerbait egin beharko du»

► Uste dut nahikoa adar jotze egin digutela Vera eta Barrionuevorekin. Gainera, euskal presoek aspaldi behar lukete hemen. Ordua da abertzale guztiak batu eta kalera irteteko. Madrileko gobernua, itsua eta egoskorra ez bada, zerbait egin beharko luke gaurko jendetza ikusita. Argi gelditu da abertzale guztiok zer nahi dugun, eta Madrilek kon-tuan izan beharko du hori».